

四庫全書

集部

欽定四庫全書

集部

傳家集卷三至

詳校官庶吉士臣李如筠

檢討臣何思鈞覆勘

總校官庶吉士臣倉聖脉

校對官監丞臣張魯炳

謄錄監生臣陳燦

欽定四庫全書

集部三

傳家集

別集類二 宋

提要


臣等謹案傳家集八十卷宋司馬光撰凡賦一卷詩十四卷襍文五十七卷題跋疑孟史劄記一卷透書一卷壺格策問樂詞共一卷誌三卷碑行狀墓表哀辭共一卷祭文一卷光大儒名臣固不以文重然即以文論亦所

謂辭有體要者邵伯溫聞見錄記王安石推其文類西漢不誣也伯溫又稱光除知制誥自言不善為四六神宗許其用古文體今按集中制誥亦有儼體者但語自質實不以駢麗為工耳邵博聞見後錄謂光辭樞密副使疏傳家集不載博獨記之熙寧中光嘗論西夏事其疏亦不傳惟畧見于元城語錄中又論張載私謚一書載張子全書之首稱其真

述在楊時家本集不載則亦頗有散佚矣光  
所作疑孟今載集中元白珽湛淵靜語謂為  
王安石而發攷孟子之表章為經實自王安  
石始或意見相激務與相反亦事理之所有  
疑斑必有所受之亦可存以備一說也乾隆  
四十四年五月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

傳家集卷一

宋 司馬光 撰

古賦

交趾獻奇獸賦

嘉祐三年八月  
二十七日上

皇帝御天下三十有六載化洽於人德通於神邇無不  
協遠無不臻粵有交趾來獻麒麟其為狀也熊頸而鳥  
嘴狔首而牛身犀則無角象而有鱗其力甚武其心則  
馴蓋遐方異氣之產故圖譟靡得而詢於是降輶車之

使發旁縣之民除塗於林嶺之隘引舟於江淮之濱曠時月而涉萬里然後得入觀于中宸與夫雕題卉服之士南金象齒之珍款紫闈而全入充彤庭而並陳於是羣公卿士百僚庶尹儼然垂紳薦笏旅進而稱曰陛下功冠邃古化侔儀極恭承神祇嚴奉宗稷純孝烝烝小心翼翼出入起居不忘於訓典進退周旋必咨於軌則體文王之卑服遵大禹之菲食宮室觀臺無磬刻之華輿馬器用無珠玉之飾遊必備於法駕燕不廢於朝夕

此皆帝王所不能為而陛下行之尚不忘於怵惕是以  
方內乂寧黎民滋殖垂髫之童耳皆習於詩禮戴白之  
叟目不睹夫金革至於根著浮流跋行喙息無不翔舞  
太和涵濡茂澤此殊俗所以響臻靈獸所以來格雖漢  
室之初黑鵲貢於絕徼周家之隆白雉通於重譯殆不  
足方也臣等謂宜命協律播之聲歌詔太史編之簡策  
以發揮不世之鴻休張大無倫之不績不亦偉乎皇帝  
乃穆然深思愀然不怡曰吾聞古聖人之治天下也正

心以為本修身以為基閨門睦而四海率服朝眾和而羣生悅隨故務其近不務其遠急其大不急其微今邦雖康未能復漢唐之宇宙雖阜未能追堯舜之時况物尚疵癟而民猶怨咨朕何敢以未治而忘亂未安而忘危享四方之獻當三靈之釐且是獸也生嶺嶠之外出沮澤之湄得其來吾德不為之大縱其去吾德不為之虧柰何貪其琛賚之美悅其鱗介之竒容其欺紿之語聽其諂諛之辭以惑遠近之望以為蠻夷之嗤不若以

迎獸之勞為迎士之用養獸之費為養賢之資使功烈  
烜赫聲明歲寔廢耳目一日之玩為子孫萬世之規豈  
不美歟於是羣臣拜手稽首咸曰此盛德之事臣等愚  
憲所不及陛下誠有意於此臣等敢不同心竭力對揚  
而行之皇帝於是御棫樸之篇觀大畜之繇延黃髮之  
儒顯巖穴之秀善有可旌無間於幽遠言有可采不棄  
於微陋位匪德而不升官無能而不授使稷契居左皋  
夔立右伊呂在前周召侍後相與講經藝之淵源覽皇

王之步驟求大化之所未孚訪惠澤之所未究興民之利若療夫饑渴除民之害若憂夫疾疚賜予簡而功無所遺刑罰清而姦無所漏浮費省而物不屈於求須苛役蠲而農不妨於耘耔使之夏有葛而冬有裘居有倉而行有糗絲纊之饒足以養其老甘脆之餘足以慈其幼地不加廣而百姓足賦不加多而縣官富道塗之人恆爭而喜讓閭閻之俗棄漓而歸厚戶知禮義之方人享期頤之壽然後旃裘之長煩穎而整服祝髮之渠回

面而奔走靡不投利兵而襲冠帶焚僨服而請印綬於是三光澄清萬靈敷佑風雨時若百稼豐茂休氣充塞殊祥輻輳甘露霖霖於林薄醴泉觱沸於嵌竇華莖羅植於堦阤朱草叢生於庭審鳳凰長離駢枝而結巢黃龍駒虞羣友而為畜由是觀之則彼裔夷之凡禽瘴海之怪獸皮不足以備車甲肉不足以登俎豆夫又何足以耗水衡之芻而汚百里之圃者哉

稷下賦

齊王樂五帝之遐風嘉三王之茂烈致千里之奇士總百家之偉說於是築鉅館臨康衢盛處士之遊壯學者之居美矣哉高門橫闊夏屋長檐蹲鑿明潔几杖清嚴爾乃雜佩華纓淨冠素履端居危坐規行矩止相與奮髯橫議投袂高談下論孔墨上述義炎樹同拔異辨是分非榮譽樵株為之翁蔚譬毀珵美化為瑕玼譬若蘭芷蕙莎布濩於雲夢之洳鴻鵠鶴鶴鼓舞於渤海之涯於是齊王沛然來遊欣然自喜謂稷下之富盡海內之

美慨乎有自得之志矣祭酒荀卿進而稱曰吾王闢仁  
義之塗殖詩書之林安人之慮廣致治之意深然而諸  
侯未服四鄰交侵士有行役之怨民有愁痛之音意者  
臣等道術之淺薄未足以稱王之用心故也王曰先生  
之責寡人深矣願卒聞之對曰臣聞之珷玞亂玉魚目  
間珠泥沙漲者其泉恩茂莠茂者其穀蕪網者棄網而  
失叙行者多歧而喪塗今是非一槩邪正同區異端角  
進大道羈孤何以齊蹤於夏商繼軫於唐虞誠能撥去

浮末敦明本初修先王之典禮踐大聖之規模德被品物威加海隅忠正修列讒邪放蹠行其言不必飽其腹用其道不必煖其膚使臣飯粱齧肥而餐驕君之祿不若荷鉏秉耒而為堯舜之徒惜夫美食華衣高堂閒室鳳藻鴟義豹文糜質誦無用之言費難得之日民未治不與其憂國將危不知其失臣竊以大王為徒慕養賢之名而未覩用賢之實也已

靈物賦

元豐元年六月  
二十七日作

有物於此制之則留縱之則去卷之則小舒之則鉅守  
之有主用之有度習之有常養之有素譽之不喜毀之  
不怒誘之不遷脅之不懼吾不知其何物聊志之於茲

賦

傳家集卷一

欽定四庫全書

傳家集卷二

宋 司馬光 撰

古詩一

贈邵興宗

窮達有常分得喪難豫言古今浩茫茫倚伏安可原軒  
裳彼自榮舉俗同崩奔鎔銖校重輕冰火殊涼溫君子  
固無愧立身明本根度矩苟不愆寵辱徒喧喧有如清  
濟流橫貫長河渾景公馬千駟南面雄東藩陶青劉舍

徒位為丞相尊當時非不顯磨滅何足論顏回在陋巷藜藿甘盤飧原憲結弊衣蓬蒿塞其門當時豈不窮至今榮名存況君齒方壯德業素所敦安知翊翅歸不作凌雲飜要之白首期壯烈施元元為君盡善策灑掃清前軒長舒四五榻客來輒開樽群愁喜伺人稍醒必煩寃拒之亦無佗體中常昏昏

邵興宗南園草盛不翦僕過而愛之為詩以贈君家在何許遠與南城鄰車馬不甚繁門前無俗塵有

園廢鉏治繞舍皆荆榛入夏益滋蔓鬢髮高沒人豈無  
舊桃李蕪雜與之均謂言彼草木於我奚踈親於間置  
取舍豈得完天真不若任其然同受雨露仁物性且不  
違人心何縚磷閉戶不迎客箕踞無冠巾苟忘軒冕心  
何異巢居民

送文慧師歸眉山

應符

至人心如雲去住唯所適飄颻涉四海豈復較喧寂竭  
來王城遊紅塵曖晨夕忽思還故峯不可留宿昔離合

皆自然於何寄驩戚從茲坐林下白首傲泉石山鳥集  
掌中巴猿侍瓶錫寺前煙蔓深何處求行跡

出都日塗中成

請告歸陝及之汾  
陰省兄時所為

賤生習山野愚陋出於骨雖為冠帶拘性非樊籠物揚  
鞭出都門曠若解纖繩是時天風惡靈沼波蕩汨龍鬢  
互騫騰鷗羣遠浮沒川原寢蹠豁煙火稍蕭瑟草木雖  
未榮春態先髡髮桑稀林已斜柳弱條可屈蛛絲胥晴  
陽鼠土壅新窟徐驅款段馬放轡不可咄與爾同逍遙

紅塵免蓬勃

重經車輞谷

昔年道經車輞谷直上七里鹽南坡今年行役復到此  
方春流汗如翻波中塗太息坐盤石涕泗不覺雙滂沱  
我生微尚在丘壑強若麋鹿嬰虞羅人踰三十只有老  
後時過此知如何雲泉佳處須速去登山筋力行蹉跎

送崔尉堯封之官巢縣

弱歲家淮南常愛風土美悠然送君行思逐高秋起巢

湖映微寒照眼正清泚低昂蹙荷炎明滅紫葭葦銀花  
鱠肥魚玉粒炊香米居人自豐樂不與佗鄉比況得良  
吏來倍復蒙嘉祉君為太學生氣格已英偉登科如拾  
遺舉步歛千里毋嫌位尚微觀政此為始尊公久場屋  
上國困泥滓豈不重相離念子勉為理當令佳譽新燃  
燧滿人耳高堂雖在遠聞之足為喜何必羞三牲然後  
稱甘旨

酬宋次道初登朝呈同舍

林葩積浮脆煙霧於春姿山桂結芳堅冰霰橫秋枝夫  
君名卿嗣華實雙歲蕤如何仕不偶通籍鬢生絲豈非  
秋桂類不足煩嗟咨我今三十餘汨沒無佗竒正恐食  
浮人敢言位猶卑同登天子廷自視誠非宜清朝正求  
治諫路方坦夷太平可立致此任非君誰

奉同范景仁宋次道太常致齋韓廷評維見過

閹人不時內韓去乃知為詩謝之

端居太常署寒日淡孤清取酒呼諸友談笑方縱橫韓

君士林秀四海依高名家襲鍾鼎貴身無簪組縈逍遙  
風塵外萬物秋毫輕未嘗妄過人所過以為榮如何枉  
玉趾及門失相迎主人豈傲客事有迷悞并追延既不  
及相視徒嗟驚威鳳顧脩梧不下還孤征景星歛呈彩  
旋有流雲生靈物固難覩俗眼真不明投謝有何物珉  
石從雙瓊

送守哲歸廬山

哲公金陵來神韻自孤秀京華三十春高節愈幽茂烜

赫公卿門道俗日奔走自非趣尚合一息不相就慷慨  
賢豪士波溢千金富蔬飯苟有餘秋毫未嘗受齧噉不可  
變堅白如瓊瑤居然尚愁寂終厭塵土臭忽思香爐雲  
蒼蔚冠孤岫振衣尋昔遊煙霞宛如舊絡木藤蔓長  
攫石松根瘦瀑泉響夜壑乳管添春竇茅茨蔭方丈宴  
坐度清晝几席雨奇花階除馴猛獸方知物外樂回視  
人寰陋慎勿露聲光愚迷將輻湊

清明後二日同鄰幾景仁次道中道興宗元明

秉國如晦公踈飲趙道士東軒以日暮天無  
雲春風扇微和為韻得和字

寂寥清明後餘春已無多閒軒富佳致不惜載酒過水  
木晚尤秀風煙晴更和臨樽不盡醉柰此芳菲何

晉康陳生

庸

家世以孝悌聞有異木連理生其

庭郡欲旌表其門不果王禹玉為之求詩於  
朝之士大夫以紀之

靈珠蟠泥沙積水不能掩賢人畜美德久矣自標檢陳

生世同財百口共豐儉遠居嶺海間天質非陶染邦人  
慕其行闢辨日衰減祥木并殊柯童童植軒檻或欲揭  
其門令人識儀範愚公私不然外獎由內歎已能孝悌  
著默致神靈感何必賜牛酒然後明褒貶況茲詩詠末  
瑣瑣事鉛槧才薄不敢辭適能為汙點

送邵興宗之丹陽

赤日裂后土萬家如烘爐君行何事役似為貧所驅埃  
塵稍去眼雲景日蕭疎扁舟乘長風倏忽變三吳六年

羈旅倦一旦誰掃除慎勿忘回首浩蕩江山娛

瘦盆

瘦盆生以醜自鬻突兀當軒聳羣目海龜鬪怒腹幹張  
老鯫蟠蟄鱗鬚禿昔時仙客浮孤槎波痕漬朽成凹窪  
蜀都買卜置之去爾來流落嚴遵家誰逢好事得寶蓄  
裁供盥濯真可辱況為飲具承歡娛未必蟠根勝珠玉  
不若剖為太古尊滿斟明水羞百神山桴甞籥薦忠信  
坐使風俗還淳淳

送張兵部

中庸字元常

知遂州

劖嶺橫天古棧微相如重駕傳車歸雙親倚門望已久

千騎踏雪行如飛人間富貴非不有似君榮耀真亦稀

聞道西州遺畫像使我涕淚空沾衣

先人知小溪縣正板籍均賦役閩邑

人至今誦之  
畫像猶存

同舍會飲金明沼上書事

日華駘蕩金明春波光淨綠生魚鱗煙深草青遊人少  
道路苦無車馬塵石渠諸君職事簡載酒擷花畏花晚

浮舟逐勝任所之箕踞狂歌叩舷板眼花耳熱氣愈豪  
擲杯擊案聲噭噭驚沙颯颯繞洲渚魚龍遷去避我曹  
人生大料無百歲貴賤賢愚同一致在家散菽餘幾何  
一日風光不宜棄

新遷書齋頗為清曠偶書呈全董二秀才并示

姪良富

長夏暑候濁雲火高嶺屹豈徒肌骨煩木巻川流乾新  
居得南齋楹檻稍虛寬森羅對草樹曉暮清陰寒汎掃

布几簟氣體粗可安圖書雖非多亦足備覽觀聖賢述  
事業細大無不完高出萬古表遠窮四海端於中苟得  
趣自可忘寢餐況今有道世穀祿正可干勗哉二三子  
及時張羽翰力學致顯位拖玉簪華冠毋為玩博奕趣  
取一笑歡壯年不再來急景如流丸

奉同何濟川迎吏未至秋暑方劇呈同舍

驛金避老火暑勢尤驕盈朱光燦厚地萬葉焦無聲夫  
子久倦遊得郡為親榮束裝待騶吏歸期殊未成埃沙

塞廣陌蓬蘽擁前楹出處兩不愜孤坐心煩縈何時驚  
飈來掃蕩天地清郊墟草樹疎千騎從雙旌飄颻若神  
仙阜蓋西南征離羣詎幾時豈不懷友生有意肯相過  
不妨巾屨并官舍稍虛涼愧無殼酒迎

晚食菊羹

朝來趨府庭飲啄厭腥羶況臨敲朴喧憒憒成中煩歸  
來褫冠帶杖屨行東園菊畦濯新雨綠秀何其繁平時  
苦目病滋味性所便采擷授厨人烹淪調甘酸毋令薑

桂多失彼真味完貯之鄱陽甌薦以白木盤鋪啜有餘  
味芬馥逾秋蘭神明頓颯爽毛髮皆蕭然迺知愜口腹  
不必矜肥鮮嘗聞南陽山有菊環清泉居人飲其流孫  
息皆華顛嗟予素荒浪強為簪綾牽何當葺弊廬脫略  
區中緣南陽勻嘉種蒔彼數畝田抱甕親灌漑爛漫供  
晨餐浩然養恬漠庶足延頽年

和吳冲卿崇文宿直賜壁上題名見寄并寄邵

不疑

冲卿詩序僕與不疑三人同登進士同自太學官入校集賢書又嘗同直一室

今不疑謫南方僕佐東平冲卿  
因宿直觀壁上題名為詩代書

白袍昔紛紛相與會東堂帝梧碧蕭瑟翔集皆鸞鳳伊  
予素空踈濫吹翰墨場不為羣雋遺出處聯簪裳爾來  
凡六閨轉轂飛炎涼同歌大學下共醉金馬旁脩竹壓  
牕寒天桃倚戶芳金盤剖盧橘玉壺分蔗漿驚呼局上  
急嘲笑杯間狂神情一契會形迹兩俱忘歡餘嘆薄宦  
離合何能常濡毫紀歲時揮霍素壁光去秋隨相車沿  
牒來東方城中未徧辭不疑逐南荒奔波走郊外取別

何蒼黃舉觴未及盡亟歸還束裝行行到官下日積簿  
領忙文書擁筆端胥吏森如牆況當三伏深霑汗尤淋  
浪細蠅繞眉睫驅赫不可攘涔涔頭目昏始覺冠帶妨  
誠知才智微吏治非所長懼貽知已羞敢不益自強因  
思甌閩遠南走侵溟漲炎蒸異中縣從古無雪霜終朝  
坐茅屋鹽茗征行商謹譁費口舌解囊收毫芒不疑性  
高介此困安可當山川幾千里間訊誰能將冲卿居京  
邑青雲正騰驤寓直紫臺上風露澄東廂清夜不成寐

緩步聊彷徨拂此壁上塵遠懷同舍郎英辭歎感發高  
義紛激昂泠泠宮殿虛諷咏何琅琅手書成兩通貯之  
古錦囊一徃泉山南一致汶水陽堅重金璧體光寒矛  
劍鋌迺知賢雋心淺俗未易量何嘗用榮枯遽爾分否  
臧居然激衰薄更使清風揚

昔別贈宋復古張景淳

昔別如飛蓬飄蕩隨所適那知十六載卮酒對今夕渺  
然思舊遊間不容一息百年詎幾何會合難屢得復古

素愷悌志行重金錫皎如百鍊精不為燥濕易景淳氣  
高逸浩蕩誰與敵下筆驚雷霆龍蛇走屋壁居然器業  
美但有富貴逼佗時綰金印羈束愈愁寂須窮今日懽  
快意浮大白勿辭簪弁傾頽然倒樽席

初見白髮慨然感懷

萬物壯必老性理之自然我年垂四十安得無華顛所  
悲道業寡汨沒無佗賢深懼歲月頽宿心空棄捐視此  
足自儆拔之迺違天留為鑑中銘晨夕思乾乾

謝胡文學九齡惠水牛圖二卷

牛生天地間益物用最大其功配坤元彖爻參衆卦血  
毛類上帝肸懲鑿景福介宗廟及賓客百禮無不在引耒  
刺中田粒食烝民賴服箱走四方竭力任重載昔聞戴  
叟筆圖寫窮纖芥胡君繼其妙差肩立異代公卿仰名  
聲一觀不可勾如何散賤者遠有雙圖賚所嗟性顯愚  
雅不曉佳畫有如歌九韶鐘鼓樂聾聵得之乃虛器無  
異居大蔡神物恐化去立召風雨怪雙圖雖卷還重覩

敢不拜

王書記以近詩三篇相示各摭其意以詩賡之

感遇

白鵠出江渚刷羽何鮮新志陵青霞端欲飲天漢津清  
飈未我與波澤聊逡巡偶為虞羅獲遠趣無由伸樊籠  
厭局促野性那能馴庭除數驚顧慘慘常畏人皓素不  
入俗衆目誰為珍稻粱不充腹日與鷄鶩鄰舉頭畏太  
高俛啄空愁辛蕭蕭斂六翮憔悴傷精神男兒五十不

如意青衫華髮遊埃塵鄉為鹽官北如晉今為幕吏西  
適秦慨然遂欲拋手板拂衣高蹈錦水濱長竿短艇入  
煙雨放歌酣飲歌烏巾方今聖朝清似水林空谷靜無  
隱淪吾君夢卜偶未到勿學君平與子真

投梅聖俞

聖俞精為詩堅重比白玉至寶識之希未必諳衆目應  
辰仰高風跂聳自西蜀平生未相識歎歎不自足薄遊  
困京師旅食止脫粟得官當入秦行李未結束先求聖

俞門執轎請所欲九衢季冬月風沙正慘黯羸馬憊遠  
行毛鬢寒瑟縮旅拒不肯前一步九刺感飢童袖擁口  
手足盡斂瘃論詩久未出竊罵怨滿腹歸來面揚揚氣  
若飫梁肉累累數十字踈淡不滿幅自謂獲至珍呼兒  
謹藏蓄長安十五驛重複間川陸置詩懷袖間勑憑輒  
披讀高吟桑野闊目暝即投宿自可忘羈愁行瞻灞陵

曲

呈范景仁

劖山中斷融為川清江雙流鬱迴旋溝塍阡陌粲如繡  
香航紫艤皆良田地靈物秀氣淑美由來袞袞生英賢  
朝家文明所及遠於今臺閣尤蟬聯獵纓鳴佩走聲望  
出入金馬如雲煙柰何應辰獨嫖坎華髮未得離賓筵  
璵璠懸黎已為寶結綠豈得偏棄捐願君彈冠自重惜  
邑人行誦子虛篇

酬胡侍講先生

璵字之見寄

后王命天官考績弊群吏屬曹省閥閱專職米鹽事賦

生偶承乏竊祿聊自庇才力困不逮慘慘日憂惄賴依  
僚友賢割裂沛餘地自知雖寄名不足繫軒輕先生喜  
誘掖貽詩極喪責誰云歲杪寒面熱汗沾漬非不悅子  
道駑鈍力難致常恐負吹噓終為重言累

同張聖民過楊之美聽琵琶女奴彈啄木曲觀  
諸公所贈歌明日投此為謝

坐曹據案心目疲出門上馬行何之闕然久不見之美  
率意共徃初無期正逢攬轡欲有適為我却解連環羈

閒軒適足容數客夏木初繁有佳色呼兒取次具杯盤  
青眼相逢喜無極檀槽錦帶小青娥妙質何須誇綺羅  
按絃運撥驚四座當今老手誰能過彈為幽鳥啄寒木  
園林颯颯風雨和啄長爪短躍更上丁丁取蠹何其多  
曲終拂羽忽飛去不覺酒盡朱顏酡已聞啄木曲又觀  
啄木歌雄文更復值絕藝有如天際傾長河今朝壯觀  
誠極樂去此將柰寂寞何歸來解帶豁胷腹坐踞胡牀  
仰看屋從今三日不洗耳耳內泠泠有殘曲人間何物

號富貴紝紫懷金盡虛器如君自處真得策身外百愁  
都擲置太學餐錢月幾何客來取酒同醒醉

晚歸書室呈錢君倚

薄領日沈迷事役等胥靡得歸無所為未免閱書史一  
種勞精神胷中異憂喜人生無苦樂適意即為美迺知  
抱闊人不必羨青紫

偶成

於陵薄三公桔槔親灌園伯成輕南面執耒耕丘樊淵

明恥為令乞食倚人門  
賢人樂遂志榮辱安足言鄙哉  
夸毗子結駟乘朱軒

同錢君倚過梅聖俞

王畿天下樞薄領日填積自非奉朝請九衢未嘗識今  
茲到東城胥靡斃逃役近指聖俞居安能不徃覩一室  
靜蕭然昏碑帖古壁叩階讀新詩迷闇得指擿笑言殊  
未足黯然日將夕呼馬涉歸塗燈火已歷歷又知幾何  
時更有重來迹

梅聖俞惠詩復以二章為謝

我得聖俞詩於身亦何有名字託文編佗年知不朽

我得聖俞詩於家果何如留為子孫寶勝有千年珠

和錢君倚藤牀十二韻

嗟予仕京府謀祿非謀身豈徒勞百骸消鑠侵天真所  
畏曠官誅敢辭從事勤朝訊獄中囚暮省案前文雖有  
八尺牀初無偃息痕比歸斃解帶日沒軒窓昏授枕未  
及就撲面愁飛蚊未能習律令何暇閑皇墳夫君天才

秀明穎排糾紛右曹況清簡剝裂奚足云未遇且堅卧  
逢時將致君行當起經濟膏沐醒吾人

旬慮十七韻呈同舍

府官無旬休慮問廻遊息詔書禁從詣還舍始朝食緩  
帶對藜羹下筋免促迫門前吏卒散却掃謝來客北軒  
有藤牀今晨始拂拭蓬髮亂宜梳霜髭閒可摘開囊曬  
藥物發笥出書冊菊畦親灌浸茶器自消滌於時孟秋  
末天晴色紺碧林葉雖未零風聲已漸瀝神明還九藏

清氣襲百脉征夫解甲胄疲馬脫羈勒蜚鳥開樊籠跳  
魚出鼎鬲形骸盡我有不復為物役雖非久安逸幸得  
少頃適訟庭止敲朴咫尺異喧寂明朝不能然顧盼愁

月夕

夜坐

春陽氣未勝重為陰所乘涔涔積雨闋慘慘餘寒增流  
雲鬱不開烈風尚憑陵夜闌閉戶牖青暈生昏燈僅僕  
悉已眠書几久欹凭涉獵閱舊聞轉使心魂澄有如行

役歸丘園恍重登又如遠別離邂逅逢友朋嗟嗟宦遊  
子何異魚入罇奪其性所樂強以所不能人生本不勞  
苦被外物繩坐愁清旦出文墨來相仍吏徒紛四集僕  
僕如秋蠅煩中劇沸鼎入骨真可憎安得挿六翮適意  
高飛騰

二月中旬慮問過景靈宮門始見花卉呈錢君  
倚

賤生叅府僚勉強踰半歲終非性所好出入意如醉訟

庭敲朴喧衆草絕生意不知有青春倏忽已改燧周章  
連日忙爛漫數宵睡軒窓岌飛舉風雨頗恣睢謂言芳  
菲物狼藉應掃地今晨呼馬出歷獄問囚繫窮冤清宮  
深倉琅朱門閉廣殿肅層陰虛庭藹佳氣長楊委嫩綠  
老柏淨新翠薜荔垂宛延奇石立鼎屬豁然愁憤開精  
神四面至事役難少留馬去尚回睇亦足慰無聊年華  
不都棄

和始平公夢中有懷歸之念作詩始得兩句而

寤因足成一章

元宰撫洪鈞四海可熏灼至人養天真視此猶嬰縛出入金鼓威寤寐琴樽樂迺知伊呂心未始忘丘壑

和江鄰幾六月十一日省宿書事

長夏金正伏火意尤驕盈夫子寓官舍無術逃煩蒸軒  
窓豁四開滅去壁上燈紵衣不可親羽扇安能勝濯泉  
泉已溫撫簟簟可憎萬葉悄無風但有飛蚊鳴六府燥  
不濡喉舌煙塵生攝衣起徐步四顧天正晴雲漢漫欲

涸箕畢徒縱橫忽思終南巔秀出秦雲青上有長松林  
蔽日深杳冥下有萬仞壑含蓄太古冰安得躡輕屐杖  
策緣嶧嶧挂冠芙蓉闕結屋高崖稜回視萬鍾祿影撇  
如飛蠅

和張仲通學士苦暑思長安幕中望終南秋雪  
呈江鄰幾

秋雲覆秦川小雨野未濕誰言終南頂已有霰雪集返  
景開新晴孱顏照都邑初疑江津閣遠浪橫風急又疑

龍蛻骨逶迤委原隰詞客登高樓四望清興入當時應  
百篇遺散不復拾今茲宦帝城大暑困鬱悒紅塵滿九  
衢出入冠帶襲家居賓旅來俯僂煩拜揖回思幕中趣  
引領安可及江翁養文采正如玄豹蟄君往犯其嚴騰  
起誰敢絜嗟予素恒怯旁睨毛髮立強復綴此章庶幾  
勇可習

和張仲通追賦陪資政侍郎吳公臨虛亭燕集

寄呈陝府祖擇之學士

吾家陝之北陝事吾能說孤亭占城隅形勝最殊絕雲  
消天宇空極目鳥飛滅大河西來洶湧地脉裂萬里  
卷流沙長驅走溟碣羣山勢離合披靡隨曲折林薄帶  
村墟郊原如繡纈祠宮望神禹閒田指虞芮高丘想巫  
咸空巖懷傳說聖賢迹已遠縹渺見風烈吳公昔為守  
治行瑩冰雪君從豐鎬來華館息塵轍主人喜佳客置  
酒升嶠嶢清歡浩無涯燭至樽未撤誰知捧手辭遽有  
幽明訣至今猶墮淚遺愛滿耆耋擇之新下車條教悉

施設依然典刑在先後如符節嗟予仕京邑苟祿自羈  
繼丘壑翳荒松三年灑掃缺求歸未能得朝莫腸百結  
得君臨虛詩髮鬚見里闕何時往登臨曠若目去曠憂  
來復長吟益使寸心折

次韻和吳冲卿秋意四首

槐花滿庭除籍籍不可掃稍踈召平瓜漸熟王陽棗失  
時團扇棄新進袷衣好日暮益愁思寒蟬起幽草忽聞  
秋興篇嘆賞幾絕倒

端居倦煩暑園圃久不窺雨餘秋氣新紅葉生紫梨形  
骸得蕭散不知環堵卑何能效流俗把酒須菊枝登高  
已可醉四野青雲垂

縱棹下清溪波靜地仍偏日夕水風涼蕭灑成安眠兀  
兀但高枕悠悠還進船中流忽驚寤漁父歌扣舷山川  
非鄉時回首雲霞邊

弱植生川澤託根北堂後昔時青春姿扶疎映軒牖風  
霜日消落憔悴復何有蠹穿枯節斷雨漬虛心朽幸不

天天年猶得勝凡柳

和邵不疑校理蒲州十詩

必

飲亭亭有流盃渠

飛蓋名僚集臨流芳宴開紫紜漱文石次第傳清盃迴波亦多意并泛落花來

涌泉石

樞密學士蔣公知府事得片石大如席上有數十竅莫知所施公問石工對曰

此蓋涌泉石也乃於飲亭下鑿地為壇置石其上夏日從旁激水灌之躍高數尺以清暑

氣

蒼然片石寒百道飛泉吐高堂忽蕭颯坐失炎蒸苦蛟龍卧欲飛仰嘆秋空雨

翠樓

條山翠氣橫隱嶙秋空窄危樓雨初度卷幌延佳色撲撲滿前軒嵐光真可摘

碧樓

烟瓦疊琉璃危樓半空倚歌鐘奉高宴聲來碧雲裏日暮天四垂黯澹如秋水

靜齋

逸二句

聞山鳥呼未得全幽寂

槐軒

聊窺碧甃缺寒草生歷歷時

逸二  
軒已幽況復植宮槐簷外陰沉綠南山雨氣來道  
遙不知久驚此黃花開

涼逸一字

逸二句

清風滿四境豈獨華棟下不

若楚臺人披襟獨蕭灑

芙蓉軒

荷花爛漫紅不見方塘水蕉蕎結飛閣草卷清香裏露重忽欹側翩然翠禽起

惜花亭

春意復蹉跎園林日愁寂枝邊綠陰重砌下紅英積茲  
亭花最繁飄零尤可惜

竹軒

茂密正當軒欹垂欲侵案風枝忽交夏月影爭凌亂誠  
嘉君子心匪直林亭玩

和昌言官舍十題

石榴花

靈根逐漠臣遠自河源至流離徧中壤今茲盡苗裔畏  
日助殷紅凍雨滌濃翠宜攜避暑客花下縱橫醉

薏苡

佳實產南州流傳却山瘴如何馬伏波坐取丘山謗夫

君道義白復為神明相厲氣與流言安能逞無狀

石蘭

楚人歌紫蘭華禁無傳久循名意茲是誰得明真否天  
憐菊性孤秀發秋風後固令芳物生聊作黃花友

萱草

葉濯宿露翠花迎朝日黃昔誰封殖此儼列侍高堂達  
生隱於吏軌為行與藏逍遙玩永日自無憂可忘

蜀葵

白若縞初斷紅如顏欲酡坐疑僂駕巖幢節紛駢羅物  
性有常妍人情輕所多菖蒲儻日秀棄擲不吾過

畦蔬

隙土惜荒棄翦治成春畦講雩時澤洽葵莊高參差釅  
渠若貫脉疏塍如畫棊為吾謝來客桔槔毋語機

水紅

夢想水鄉遊階庭植籠古宛如江外行高帆落寒浦煙  
枝靜踈秀風穂閒低舉於今看未好漠漠宜秋雨

甘菊

野菊細瑣物籬間私自全徒因氣味殊不為庖人捐采  
升白玉堂薦以黃金盤願若南陽守永扶君子年

蘭

賢者非無心園夫自臨課執植日繁滋芬芳時入座青  
蕙春茹擢皎潔秋英墮正苦郢中人逸唱高難和

病竹

園竹久不治蕪沒真可弔豈無枯槁容蕭踈自殊調至

人愛高節命斧除藜蘆何用報至恩清陰與長嘯

謝興宗惠草蟲扇

吳僧畫團扇點綴成微蟲秋毫宛皆具獨寫天地功細者及蛛蝥大者纔阜螽枯枝擁寒蜩黃幕粘飛蜂翾然得生意上下相追從徒觀飛動姿莫睹筆墨蹤兒曹取真物細校無不同恐其遂躍去亟取藏箱中乃知藝無小意精神可通不與誤圖蠅能惑紫髯翁子猷狀蟬雀藏寶傳江東不知古何如此畫今為雄人墓木已拱其

徒頗能工舊法存百一要足超凡庸友人幸為賜物薄  
意何隆玩之不替手愛重心無窮常如對君子穆穆來  
清風

傳家集卷二

欽定四庫全書

傳家集卷三

宋 司馬光 撰

古詩二

和王勝之雪霽借馬入局偶書

勝之家本公侯貴弱冠英才已驚世雒陽多士誰敢倫  
千古比肩唯賈誼昔遭絳灌深切齒奔走十年為下吏  
近方拭出泥塗稍學和光匿鋒銳會計之官豈足為  
鼴勉薄書聊自庇王城九衢臘月尾風雪數朝窮恣睢

櫨間款段疲且病借馬於人亦疲曳揚鞭掣轡趨省廷  
刺史不前泥沒鼻慨然遂有勞者歌滿紙雄文欵軒輕  
人生榮遇有早晚視此錙銖勿闊意況君卓犖高出羣  
異日青雲終自致鮮車大蓋擁驛駘莫忘今朝乘小駟

齊山詩呈王學士

哲字微之

江上有奇山羣峯矗如翦昔聞齊刺史置酒升絕巘其  
人有惠政嘉名自茲遠君來踵其迹詞牒日清簡驪駒  
時入谷勝地窮搜選問俗復懷人非徒事遊衍

吹簫

古人吹簫者以和虞韶聲後世不復貴給喪仍賣餧

和始平公見寄

嚮來從後車雍容鎮藩垣政成薄書簡終日侍清樽今  
茲備言職不得登朱門違離詎幾時風色變寒溫忽聆  
吉甫什穆如承語言安得六翮生隨意遠飛翻垂耳倦  
新羈蹀足思華軒諒無伯樂顧疲勞安敢論

又和并寄楊樂道

聖主樂忠諫曲從如轉圜玉色粹陽春至仁生自然所  
慙羣臣愚無以稱開延賤生何為者側足青規前頑石  
不可鍊安能補高天狂簡昧大體所依官長賢有如驥  
之駒左右隨周旋庶幾助山甫袞職無尤愆絰思老成  
人阻親凶丈筵豈不寸心勞動為纏微牽何當執壽卮  
跪起得差肩相顧藐無期瞻望徒悄悄

朝雞贈王樂道

小雞距短雙翅垂廣場勇鬪無所施清曉長鳴獨先衆

朝者恃此能知時星河滿天月光白東望扶桑悄無色  
一聲高舉耳目醒四遠羣陰俱辟易陋巷人踈煙火稀  
永夜沈沈鐘鼓微聞之徐起就盥櫛顛倒不復憂裳衣  
君家迥居北城曲阿閣嶢峣日鳴玉蕭蕭風雨得司晨  
不使無功啄君粟

謝始平公以近詩一卷賜示

皇家駿命承蒼穹烝民之傑生維嵩聖賢會合若符契  
坐致四海登熙隆三階清平九鼎重指麾拱揖安華戎

人情誰不樂將相往往皓首忘疲癃北平飲乳尚懷印  
千秋乘車猶入宮唯公致政年甫至耳目明利志氣充  
幡然脫去萬鍾祿羽儀高遠如翔鴻靈臺不復結塵務  
至德恬淡含黃中英華純粹積不發事業轉為文字工  
大篇短韻間金石遠追吉甫流清風刻雕衆物非用意  
默與元化參神功應劉鮑謝事竒巧細瑣豈足誇才雄  
裸圭夷玉清廟器肯與環玦爭玲瓏絳帳生徒東閣客  
微官拘累如樊籠言詩何敢望商賜幸得誦詠祛童蒙

昏花病目不自惜服膺盥手書一通千金之產不可易  
子孫寶蓄傳無窮

早春戲作呈范景仁

閏餘春意早卉木先有思嚶嚶羣鳥翔東西各求類伊  
予忝諫垣動息抱憂憇衆職曠不補言責真可畏況復  
禁過從陋巷若囚繫茅茨庇風雨偏隘無餘地時於壞  
垣隙歷歷生新薺君侯乃比鄰跬步難自致常思去歲  
初西軒學歌吹座客皆故人歡笑無拘心平生不喜酒

是日成爛醉。豈言長揖歸。良會難再值。東風忽復來。  
時華一何駛。叢竹固無恙。夭桃作花異朝廷。正清明詎肯  
容竊位。何當遂廢放。歡飲還自恣。

夏夜

溽暑鬱不開。蟻蟻雲萬疊。長風卷地來。凍雨不濡葉。雖  
無潤物功。涼冷得所愜。須臾號怒息。清月照壁頰。小冠  
簪短髮。衣裾輕獮獮。欹傾依曲几。暫爾蘇疲荼。坐久不  
思眠。草間微露浥。

和范景仁西折野老

西郊廣路浮壤黃上天雨泣寒雲蒼鸞旗闌戰紛掩靄  
扈從威神歸帝鄉田家老父眉睫白杖藜匍匐泣路傍  
且云生逢至仁主蠲租罷役歲為常蠶收百箔桑蔽野  
麻麥極望無邊疆去年翠華出塞雨錦繡綿絡墟里光  
拜迎六馬負纁帛孫扶嫗接歸揚揚自分謳歌畢餘景  
一朝縞素安可防哀聲湧洞徹四極草木慘淡顏色傷  
螻蟻衰齡不足贖淚如飛雪空霑裳河濛洛貫嵩峯足

泉底寰瀛日月長義門已閑屬車返輶上空瞻金鳳凰

種竹

種竹南牆陰竹生皆北嚮苟非陽在北竹性安可強乃知就陽意草木皆有情園葵最柔弱獨取傾心名

和王介甫巫山高

巫山高巫山之高高不極寒江西來曳練長羣峰森羅十二戰清犹悲號裂翠崖老蛟怒鬪推丹壁輕生重利三巴客一葉直衝高浪白船頭吟嘯坐自如仰視長天

不盈尺叢祠象設儼山椒巫祝紛紛非一朝云是高唐  
神女之所處至今暮雨常蕭蕭我聞神理明且直興亡  
唯觀惡與德安肯來從楚國君憑依夢寐為淫昏襄王  
之心自荒惑引領日望陽臺雲獨不思懷王西行不復  
返甲光照地屯秦軍蠶食黔中下荆門陵園宗廟皆燒  
焚社稷飄零不復存嗟嗟若教蛇冒時簞路藍縷皆辛  
勤

昔予嘗權宰韋城今重過之二十五年矣慨然

有懷

二十五年南北走遺愛寂然民記否昔日嬰兒今壯夫  
昔日壯夫今老叟

秋懷呈范景仁二首

草木正蕃廡孰知天地秋況茲宿雨餘景氣益和柔消  
搖愧簪綏夢想懷林丘茲志久未果素髮今已稠仰視  
白日光浩蕩浮雲流安得黃鶴羽陵風十里遊

疇昔共登仕爾來三十秋常睇絲繩直竊心鵠夷柔蹄

洙學鉅海蟾珪依崇丘行之不自疑親寡憎怨稠於今  
不亟去淪胥恐同流努力買良田遠追沮溺遊

贈道士陳景元酒

籬根委餘菊堵角擁殘葉清言久不悒何以慰疲茶朋  
樽涵太和高興雅所愜誰云居室遠風味自可接

范景仁召飲東園呈陳彥升宋次道李才元蘇

子容

去冬辱嘉招寒風方鼎屬今秋侍高宴晴日正澄麗雖

無花蔦繁且有丘樊思雖無山泉樂楚違塵土氣僕休  
散城邑馬縱脫羈繩謹呼笑言適散誕冠帶棄殊勝禁  
掖巖進止有常地

虞帝

虞帝老倦勤薦禹為天子豈有復南巡迢迢渡湘水至  
德遠無象異論紛紛起意疑大聖人姦愴亦如已乃知  
中下士何由逃謗毀

聶著作三舅謫官長沙作耐辱亭書來索詩

少連善降志無恤能忍詬茲亭名耐辱繹構自吾舅樽  
前湘水清席下湘山秀於焉忘榮枯終日醉醇酌攻愁  
若攻敵避喧如避寇因久理須通非徒保無咎

走索

伎兒欲誇衆喜占衢路交繫組不厭長縛竿不厭高空  
中紛往來巧捷如飛猱却行欠膚寸倒絃連秋毫參差  
有萬一釐粉安可逃錢刀不盈掬身世輕鴻毛徒資旁  
觀好曹偶相稱襄豈知從事者處之危且勞

邵不疑廳薜荔及竹

脩竹非俗物薜荔亦嘉草樹之君子庭人來見逾好侵  
堦鶴脰細緣壁龍鱗老紛披兩疎翠煙色宜秋早主人  
日封植清風庶長保

和公達過潘樓觀七夕市

織女雖七襄不能成報章無巧可乞汝世人空自狂帝  
城秋色新滿市翠帯張偽物踰百種爛漫侵數坊誰家  
油壁車金碧照面光土偶長尺餘買之珠一囊安知杼

軸勞何物為蠶桑紛華不足悅浮侈真可傷

酬江鄰幾問不飲栽菊

鄰幾詩曰君實不飲酒庭下多栽菊不知黃花

開余此杯中緑凌晨煙露滋後日  
風霜促欲表君苦心宜種子猷竹

黃菊本天物先隨元化生酒醴迺人功後因儀狄成酒客  
強親菊菊酒初無情種之荒階側何嘗妨獨醒脩竹氣蕭灑自合生君庭

次韻和邵不疑假書江鄰幾知方酣寢為詩通

意

江翁順天和心迹兩夷簡雖如邊韶寢且異宰予懶平  
居無時閒經史自課限高歌慕翰林鳴琴寫中散翛然  
物外人強為章綬綰官舍苦秋霖瞬息聊休眼勤勸已  
有餘宴安何愧赧借書誰敢驚欹枕尚未暖不疑神驥  
才垂耳困阜棧碌碌隨吾儕拜揖把手版母嫌朱墨倦  
騰舉已為晚慎勿思山林山林付愚孱

八月十七日夜省直紀事呈同舍

窮秋直省舍大雨吁可畏九河翻層空入夜愈恣睢置

牀東壁根時有塗堅墜颯颯勢將摧牀惕不成寐中宵  
抱衾立呼燭久方至徙之近西偏裯帳不能備飛蚊胡  
不仁忍此加啄噬避煩只深藏悒悒面蒙被須臾漏轉  
劇枕褥亦沾漬雖起欲何之室中無燥地展轉遂達旦  
耿耿負憂憐因思閭井民餬口仰執技束手已連旬妻  
兒日憔悴囊錢與盞米薪木同時匱敗衣不足準搏手  
坐相視予今幸已多敢不自知愧無謀忝肉食念爾但

增欵

送雷太簡

南山有白雲應物任所適歟來非有心倏去還無迹甘澤望霑浹嘉生待蘇息無為遽收卷復入巖間石

和王介甫烘蟲

天生萬物名品夥嗟爾為生至么麼依人自活反食人性喜覆藏便垢涴晨朝生子暮生孫不日蕃滋踰萬箇透跡緣隙巧百端通夕爬搔不能卧我歸彼出疲奔命備北驚南厭搜邏所擒至少所失多捨置薰燒無術奈

加之炭上猶晏然相顧未知亡族禍大者洋洋迷所適  
奔走未停身已墮細者懦怯但深潛乾死縫中誰復課  
黑者抱髮亦憂疑逃入幙頭默相賀腥煙騰起遠襲人  
袖擁鼻端時一唾初雖快意終自咎致爾殲夷非爾過  
吾家篋笥本自貧況復為人苦慵惰體生鱗甲未能浴  
衣不離身成脆破朽繒壞絮為淵藪如麥如麻寢肥大  
虛腸不免須侵人肯學夷齊甘死餓醯酸蠎聚理固然  
爾輩披攘我當坐但思努力自潔清群蟲皆當遠遁播

和吳冲卿三哀詩

江鄰幾梅聖俞韓欽聖

天生千萬人中有一雋傑奈何喪三賢前後繞朞月鄰  
幾任天資浮飾恥潔刷朝市等山林衣冠同布褐外無  
涇渭分內有淄澑別逢時敢危言慷慨誰能奪聖俞詩  
七千歷歷盡精絕初無追琢勤氣質稟清潔負茲驚世  
才未嘗自標揭鞠躬隨衆後側足畏蹉跌欽聖渥注駒  
初生已汗血雖有絕塵蹤不失和鸞節宜為清廟器儀  
雅應鐘律衆論誠共然非從友朋出羣才方大來軼軋

扶帝室誰云指顧間聯翩化異物弔縗哭未已病枕氣  
已竭同為地下遊攜手不相失紳綬頓蕭條相逢但嗟  
咄誦君三哀詩終篇涕如雪眉目尚昭晰笑言猶鬢鬚  
肅然來悲風四望氣蕭瑟

和邵不疑送虜使還道中聞江鄰幾梅聖俞長  
逝作詩哭之

昨夕郵吏來叩門致書函呼奴取以入就火開其緘不  
疑賦長篇發自燕之南痛傷江與梅繼踵良人殲噫嗟

知其二尚未知其三請從北轍後覲縷為君談鄰幾雖  
久病始不妨朝參飲歟寢衰少厥遂生虛痰逮於易簀  
辰皮骨餘崆嵌遺書屬清儉終始真無慙聖俞食寒冰  
外以風邪兼愚醫暴下之結轎候愈添憊憊氣上走不  
復容鍼砭自言從良友地下心亦甘欽聖體素彊藥石  
性所諳平居察舉措敢以不壽占一朝斃歸卧薄領不  
廢簽訃來衆皆愕未信猶闕覘興言念三子舉袂涕已  
霑英賢能幾何逝者迹相銜君疑天上才難得帝所貪

我疑人間美多取神所嫌茫茫幽明際著蔡難窮探憂  
來不可忘終日心厭厭

和梅聖俞詠昌言五物

括蒼石屏

主人小石屏得之括蒼山括蒼道里遠致此良亦難層  
峩萬仞餘騰出浮雲端吳兒采石時蘿蔓愁攀緣石文  
狀松雪毫髮皆天然置之坐席旁清風常在願君善  
藏蓄永日供餘閒慎勿示要人坐致求者繁將使括蒼

民吁嗟山谷間

淡樹石屏

昔行鞶洛間馬瘦天復陰寒煙淡不收一拂橫長林當時無畫工負此清賞心今朝石上迹歷歷皆可尋輕素已紛泊老榦仍蕭森坐令高興還野氣生衣襟丹青不耐久風日易消侵何如造化真更彼歲月深昌言家素貧購此糜百金請鐫好事名千古無消沈

白鶲圖

白鶲日邊來一息萬里遙橫飛碧海晴六翮寒蕭蕭輕  
如朔雪花迥與長風飄傾身疊紺爪吟嘯何嗟嗟督來  
疾驚電歛起先扶搖遂令狐與狸不敢矜凶妖尉羅不  
可取滅影還雲霄世人莫得見粉繪圖輕綃凜然堂牖  
間霜氣生春朝風雨夜如墨古木無鳴鳥

懷素書

上人工書世所稀於今散落無復遺君從何處獲數幅  
敗絹蒼蒼不成軸雲流電走何縱橫昏醉視之雙目明

烈火燒林虎豹慄疾雷裂地龍蛇驚須臾掛壁未收卷  
陰風颯颯來吹面祇疑神物在閣中寶秘不令闢俗眼  
嗟余平生不識書但愛意氣豪有餘欲求數字置座側  
安得滿斗千金珠

縛虎圖

孫生非畫師趣尚頗奇偉為人少諧合不肯畜妻子時  
時入深山信足動百里蕭然坐盤石盡日曾不起精心  
忽有得縱筆何恢詭萬象皆自然神工相表裏流傳落

人間萬金易寸紙君家縛虎圖用意尤精緻雖云鎖組  
牢觀者猶披靡昔聞劉綱妻制虎如犬豕繫之牀脚間  
垂頭受鞭箠孫生僕未見畫此亦何理明知非世人羽  
化實不死願君佗日歸置之成都市必有乘槎人庶幾  
能辨此

獨樂園七詠

讀書堂

吾愛董仲舒窮經守幽獨所居雖有園三年不遊目邪

說遠去耳聖言飽充腹發策登漢庭百家始消伏

釣魚庵

吾愛嚴子陵羊裘釣石瀨萬乘雖故人訪求失所在三  
公豈非貴不足易其介奈何夸毗子斗祿窮百態

采藥圃

吾愛韓伯休采藥賣都市有心安可欺所以價不二如  
何彼女子已復知姓字驚逃入窮山深畏名為累

見山臺

吾愛陶淵明拂衣遂長往手辭梁主命犧牛憚金鞅愛  
君心豈忘居山神可養輕舉向千齡高風猶尚想

弄水軒

吾愛杜牧之氣調本高逸結亭侵水際揮弄消永日洗  
硯可抄詩泛觴宜促膝莫取濯冠纓紅塵汙清質

種竹齋

吾愛王子猷借宅亦種竹一日不可無蕭灑常在日雪  
霜徒自白柯葉不改綠殊勝石季倫珊瑚滿金谷

澆花亭

吾愛白樂天退身家履道釀酒酒初熟澆花花正好作詩邀賓朋欄邊長醉倒至今傳畫圖風流稱九老

和利州鮮于轉運

侁字子駿

公居八詠

桐軒

朝陽升東隅照此庭下桐叢峯復萋萋居然古人風跡  
柯青玉聳密葉翠羽蒙午景凝餘清夕照當殘紅雨響  
甍棟外風生戶牖中主人政多暇步賞常從容終當致

威鳳覽德鳴嚦嚦又將施五絃解愠歌帝宮

竹軒

茲軒最灑落歷歷種琅玕正晝薄書稀蕭蕭風雨寒翠  
陰涼宴坐踈韻承清歡錦籜裁夏扇玉筍供春槃晴燭  
潛葉底暝雀投林端幽興遇物愜高懷隨處安且免一  
日無何須千畝寬

柏軒

凜然凌霜色本自生丘壑徙之君子庭栽培固不薄靜

夜聲颺颺清晝陰漠漠秀氣逼簷楹翠影通簾箔知君  
梁棟材大匠偶未度但守歲寒心閒軒亦不惡

巽堂

華堂選形勝地直巽之隅主人心潔齊公閒此燕居西  
來故鄉客東過朝大夫時逢志所愜下榻同歡娛琴碁  
間壺觴賦詠雜歌呼民間既義皇席上宜華胥每思就  
一醉幸無官守拘奈何三千里風埃與泥塗

山齋

幽蹊入桃李危棲蟠林麓行行忽虛敞高齋出山腹園圃近指掌郊郭紛盈目春老酴醿香夏淺簷簷綠條橫喜冒衣筭迸乍穿屋秋江澄可卷冬嶺翠如撲煙間漁艇小塞外村居獨燒轉望畬田響答聆伐木驚麪挺走險鳴禽嚶出谷物華時變更興趣日相續誰知使者尊常著野人服肯以駟馬榮區區詫鄉族

閒燕亭

吏治正倥偬夫君何燕閒繭絲既云寡符移皆可刪

駿子

奏減役錢幾半朝廷是之印封從事散躡升東山放杖坐危亭清

嘯出雲間無私席賓少忘機林鳥還野人瞻翠微稽首

雙眉斑

會景亭

景物浩無窮茲為一都會之人心若鑑萬狀盡相對喬  
林擁砌底脩嶺倚聳背流雲過席上去鳥出天外徐徐  
杖屢征鵠鵠郊原晦來往亦何為逍遙真樂內

寶峯亭

孤亭冠山椒下視物不隔六合縱心賞萬家窮目力髻  
鬟烏奴翠衣帶嘉陵碧霞生白水尾日沒九隴脊煙凝  
朝夕市塵飛往來驛雖復對紛紜何嘗改岑寂實兼觀  
風遠非徒選勝適巴峽少平田每苦天宇窄及茲伏櫓  
檻坐瞰南北極先君昔乘輶名題古寺壁侍行尚垂髫  
孤露今戴白讀君登臨詩舊遊皆歷歷永無膝下歡終

篇涕霑脰

先天聖中侍先君為利州路轉運使題名諸寺子駿皆為之刻石

遊壽安詩十首

噴玉泉

蒼崖雙起秋雲齊亂峯迸出如攢犀石稜澀不容馬蹄  
下馬步入荆榛蹊瀑泉沃雪拖白霓落潭橫引成清溪  
老木長藤咫尺迷興闌欲出忘東西

神林谷二首

石下泉聲蔓草深石上露濃蒼蘚徧山禽驚起飛且鳴  
葉墜空林人不見

雞幘奇峯雲外橫青壁千尋不可上却羨樵兒輕險巇

腰繩操斧常來往

遊神林谷寄邵堯夫

山人有山未嘗遊俗客遠來仍久留白雲滿眼望不見

可惜宜陽一片秋

靈山寺流泉

去寺猶一里隔林聞水聲安知客乘興山下遠相迎

且遊

遊人戀山水日晏澹忘歸但愛雲煙好那知僕馬饑

永濟渡二首

洛水寒可涉長汀柳飛葉節物先無期自與幽懷愜清  
波見白鷗靜林聞啄木泉細入平沙雲間出幽谷

靈山寺

神林興盡謀早歸草間露裏行徑微忽思靈山去不遠  
馬首欲東還向西垂鞭縱轡尋山足洛水逶迤過數曲  
漸聞林下飛泉鳴未到已覺神骨清入門拂去衣上土  
先愛娑羅陰滿庭庭下雙渠走清澈羅縠成紋日光徹

寒聲淅瀝入肝髓亂影彫蕭動毛髮寺僧引我觀泉源  
堂東周廻百步寬碧頗梨色湛無底想象必有此龍蟠  
泉南高山名鳳翅宛轉抱泉張遠勢岸旁脩竹踰萬竿  
颯颯長含風雨氣寺門下望情豁然桑柘紛披滿一川  
窩高女几列左右王屋太行來掌前昔為孔氏懸泉莊  
巖洞猶存荆棘荒到今其下多怪石熊蹲豹攫爭軒昂  
嗟予歸來苦不早汨沒朝市行欲老捫蘿躡屣須數遊  
筋力支離難自保

藏珠石

疊石溪東山下有墜石銜九徑二尺餘其崖上脫處猶存

水齧東山根土色渥如丹危峯忽摧脫半崖銜石九陰  
陽昔融結神化不可原初疑偓佺養靈藥魑魅觸之無  
故落又疑蛟龍伏巨卵雷電擊之從此蹶或者女媧補  
天餘却下青冥遺耳珠不然盤古戲為樂聊取天弧彈  
朱雀物理萬狀終難知巧心推求徒自疲不如引客坐  
石上好竒且醉手中卮

八月十五日夜寄友人

故人音信絕對月動相思清露滴紅葉此懷當告誰秋  
風廣陵郭正是望濤時

華州祇役徃馮翊留別楚正叔

建中

芳菲不得駐會取餘春還欲知回首處渭曲蒼茫間

何秀才

漢倫

郊園五首

主人耽詩書樂道深居久挾策往來遊東岡復南畝

濁酒不取味素琴無復絃何須更清論相見自蕭然

蒼蒼竹林暝鬱鬱松氣寒縱橫興來筆欹側醉中冠

褰裳涉幽澗日落煙巖空躋躇待新月長嘯來清風  
夏木繞茅廬基酒資清宴密葉綠藏枝空聞黃鳥囀

夏日過陳秀才園林

桑蔭青青紫甚垂鮮風蕩麥生漣漪驅童策馬踏村路  
乘興出遊當訪誰槿花籬落園叢竹風日蕭疏滿園綠  
到門下馬問主人文籍先生其姓陳高談浩浩究今古  
不覺林間日將暮茅廬萬徑幸不遙不厭頻煩數來去  
陪同年吳沖卿登宿州北樓望梁楚之郊訪古

作是詩

大禹息洪潦盡野經九州波沈露羣山巍巍相嬰鉤漑  
洄澨茲土平敞誠寡仇乘高極回望坦坦無陵丘先王  
崇碑濟建祀邦諸侯玉帛從會同赴告書春秋六雄方  
逐鹿為羸弱姬周茲為會戰場蹀血無時休漢錯削七  
國禍生東南陬亞夫閉高壁坐折彊吳謀典午倒太阿  
關戶延旃裘淮泗漫腥羶房心掩旄頭人移煙火絕榛  
茂豺狼遊唐網日寢衰盜起如螟蟲相攜聚萑蒲袒臂

提鉏耰踏薄數千里焚劫無餘留聖朝定多壘劒戰包  
貔貅幕幕荆棘林膾膾良田疇未耜趣時雨黍稷豐歲  
秋昔為車騎利令賄桑麻收我來宦東土茛菪乘春流  
行行次第離固為親交留樽罍且為樂攜手登高樓是  
時新雨餘風日方和柔雲鮮亂花薄波綠迷芳洲暮暮  
游絲轉裊裊野陽浮調篁語雙鶴飈雪矯群鷗愛茲登  
臨美況復依良儔聊適笑言樂盡忘羈旅憂翔陽何冉  
冉漸與西山道驛程前有期戀此當何由分首下峩峩

悵然登暮舟

塞上 六言

胡兵欲下陰山寒烽遠過蕭關將軍貴輕士卒幾人回首生還

奉和經略龐龍圖延州南城八詠

迎薰亭

華館壓清波坐待南風至須知明牧賢善達吾君意

供兵礮

晨暮響寒泉飛輪駛風轉士飽氣益振輕與先零戰

柳湖

依依煙未歇漠漠風初靜浮花滿波面不見參差影

飛蓋園

軍中富餘暇飛蓋南城隈雍容陪後乘一一應劉才

翠漪亭

雕簷日華動滉漾照漪漣四月芰荷滿不似在窮邊

延利渠

枝分清淺流縱橫貫城市還如恩在人潤澤無終既

緣雲軒

逼漢敞高巖緣雲結飛閣東山草樹曛致足登臨樂

禊堂

簫鼓震陽休組練照芳洲意氣坐中客羞笑山陰遊

河上督役懷器之寄呈公明叔度時器之鞠獄

滄州

河災汎東郡廬井多堙淪題輿得賢佐姁嫗安疲民遂

令枯槁餘稍復蘇陽春伊人屏外飾倜儻窮天真徒觀  
浩蕩波莫測江海津矧茲同府士一一隨和珍公明抱  
全德洞澈無纈磷叔度秉峻節竦若凌霜筠顧茲不肖  
材亦齒幕中賓同依松柏陰共醉醍醐醇高論探要妙  
佳句裁清新有詩縱歡謔杯案霑衣巾曾無禮節間但  
以風期親北州有疑獄兩造正紛綸當須于公斷然後  
無冤人送行出郊歧揚鞭從此違隄繇春事起行役未  
成歸索居如幾日河草已芳菲徒然掩瑤瑟坐歎知音

稀昨夜西南風夢中東北飛行行涉滄海  
鬢鬢睹容暉寤思益惆悵天長羽翼微離懷如柳色極目正依依

華星篇

時視役河上寄  
郡中諸同舍

涼風淨掃雲無迹海月未生星歷歷貝聰珠貫拱北辰  
三五縱橫此何夕重樓疊榭出秋空鳩鵠露寒連桂宮  
瑤井迥臨丹闕外玉繩斜掛瑣牕中征人遠別空閨悄  
鍾漏蕭疏天不曉碧紗展轉無復眠卧視寒光度華沼  
漢家賢將戍臨洮結髮從軍今二毛誰憐身老心猶壯

深入長占太白高豐城古劍沉淪久匣中夜半雙龍吼  
乃知神物不自藏紫氣依稀見牛斗有客離居望所親  
遙知清夜會荀陳隄繇未息無由去不及浮槎河畔人

宿石堰聞牧馬者歌

大河之曲多寬閑牧田枕倚長隄灣鳥栖鶴散隄樹寂  
柝木聲稀宵欲闇牧兒跨馬乘涼月歷歷繞羣高唱發  
幽情逸氣生自然往往鳴鞘應疎節歌辭難辨野風高  
似述離憂嗟役勞徘徊不斷何妨近髮鬚微聞已復遠

長川冷浸秋雲白露草飄光凝碧色星踈河淡夜初長  
展轉空亭奈孤客洞簫音律京君明可憐骨朽不更生  
安得使傳哀怨意為我寫之羌笛聲

楊白華

勸君勿嫌楊花太輕薄籬下溝中紛漠漠翠鬟婢子不  
勝愁掃盡還飛滿朱閣晚來風雨送行春天無遊絲地  
無塵雪狂絮亂安可得孤樹青青愁殺人



傳家集卷三